

Na osnovu čl. 4.2., 4.7. i 7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", broj 7/02, 13/03, 76/09 i 1/11), člana 36. Poslovnika o radu Državne regulatorne komisije za električnu energiju ("Službeni glasnik BiH", broj 2/05) i člana 16. Pravilnika o licencama – Prečišćeni tekst ("Službeni glasnik BiH", broj 63/16), rješavajući po zahtjevu pravnog lica "Energy Financing Team" d.o.o., Bileća, broj 078/22 od 17. februara 2023. godine, na sjednici Državne regulatorne komisije za električnu energiju, održanoj 20. aprila 2023. godine, donijeta je

## **ODLUKA**

### **O IZDAVANJU LICENCE ZA DJELATNOST MEĐUNARODNE TRGOVINE ELEKTRIČNOM ENERGIJOM**

1. Pravnom licu "Energy Financing Team" d.o.o., Bileća, izdaje se licenca za obavljanje djelatnosti međunarodne trgovine električnom energijom.
2. Licenca iz tačke 1. ove Odluke izdaje se za period od 1. jula 2023. godine do 30. juna 2028. godine i koristi se u skladu sa Standardnim uvjetima za korištenje licence za obavljanje djelatnosti međunarodne trgovine električnom energijom ("Službeni glasnik BiH", broj 14/16).
3. Licenca za obavljanje djelatnosti međunarodne trgovine električnom energijom sastavni je dio ove Odluke.
4. Vlasnik licence je u obavezi plaćati regulatornu naknadu u periodu važenja licence, na način i u rokovima utvrđenim posebnim aktom.
5. Ova Odluka stupa na snagu danom donošenja, a njen dispozitiv bit će objavljen u "Službenom glasniku BiH" i službenim glasilima entiteta.

### ***Obrazloženje***

Pravno lice "Energy Financing Team" d.o.o., Bileća (u daljnjem tekstu: podnosilac zahtjeva), posjeduje licencu za obavljanje djelatnosti međunarodne trgovine električnom energijom, koja je upisana u Registar licenci Državne regulatorne komisije za električnu energiju Državne regulatorne komisije za električnu energiju (DERK) pod registracijskim brojem 05-28-12-80-16/18 od 23. maja 2018. godine, a čije trajanje istječe 30. juna 2023. godine.

Shodno pravu da koristi mogućnost obnove licence, podnosilac zahtjeva je izrazio svoju namjeru da djelatnost međunarodne trgovine električnom energijom nastavi i dalje obavljati, te je zahtjev za izdavanje nove licence, zaprimljen pod brojem 05-28-12-88-1/23, podnio 20. februara 2023. godine. O podnijetom zahtjevu odlučuje se u skladu s pravilima i propisima DERK-a i shodno članu 7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/11).

Zahtjev je podniet na propisanim obrascima, s dokazom o prethodno izvršenoj uplati naknade za rješavanje zahtjeva i relevantnim dokumentima, koji su omogućili DERK-u da razumije, razmatra i odlučuje o podnijetom zahtjevu, o čemu je obavijestio podnosioca zahtjeva svojim aktom broj 05-28-12-88-3/23 od 7. marta 2023. godine.

Po pregledu i provjeri svih formalnih elemenata zahtjeva, DERK je 9. marta 2023. godine objavio u dnevnim novinama i na svojoj internet stranici kratku obavijest za javnost, sumirajući zahtjev za licencu i odredio rok do 17. marta 2023. godine za dostavljanje komentara javnosti na podnijeti zahtjev za izdavanje licence.

DERK je konstatirao da nisu dostavljani komentari javnosti u vezi podnijetog zahtjeva za dodjelu licence, niti je na javni poziv DERK-a bilo koje lice kandidiralo svoj interes da učestvuje u postupku u svojstvu umješaka.

Podnosilac zahtjeva nesporno ispunjava sve kriterije, uvjete i standarde propisane zakonom i pravilima i propisima DERK-a da obavlja međunarodnu trgovinu električnom energijom jer je tokom prethodnog perioda korištenja licence permanentno potvrđivao svoje tehničke, pravne i finansijske mogućnosti i pružao dokaze da ima osigurane resurse, organizirane uvjete i utvrđene profesionalne standarde da nastavi obavljati istu djelatnost.

Nadzor svih aspekata usklađenosti dosadašnjeg djelovanja podnosioca zahtjeva s uvjetima i kriterijima za obavljanje djelatnosti međunarodne trgovine električnom energijom, dao je osnova DERK-u da pristupi izdavanju nove licence, odnosno pripremi Nacrta odluke o izdavanju licence za djelatnost međunarodne trgovine, koja bi važila novih pet godina i koja se koristi u skladu sa Standardnim uvjetima za korištenje licence za obavljanje djelatnosti međunarodne trgovine električnom energijom.

Ovaj dokument je od 25. marta 2023. godine učinjen dostupnim podnosiocu zahtjeva, kao i svim drugim zainteresiranim članovima javnosti, a omogućena im je prilika da iznesu svoje komentare i na općoj javnoj raspravi obavljenoj 30. marta 2023. godine u sjedištu DERK-a u Tuzli, uz prethodnu objavu odgovarajuće obavijesti u dnevnim novinama i objavu dokumenta na internet stranici DERK-a.

Kako je punomoćnik podnosioca zahtjeva, shodno članu 16. Pravilnika o licencama – Prečišćeni tekst, u cilju ekonomičnosti postupka, na općoj javnoj raspravi dao pisanu izjavu kojom se podnosilac zahtjeva odriče prava na dostavljanje komentara u daljnjem toku postupka, bilo je osnovano zaključiti da se prijedlog DERK-a smatra sačinjenim u skladu sa Zakonom o prijenosu, regulatoru i operatoru sistema električne enegije u BiH i podzakonskim propisima koji reguliraju predmetnu materiju.

Na osnovu svega naprijed izloženog, te respektirajući i dokaz da je podnosilac zahtjeva prethodno ishodio novu dozvolu Regulatorne komisije za energetiku Republike Srpske izdatu 17. juna 2022. godine, s rokom važenja od pet godina, DERK je odlučio kao u dispozitivu ove Odluke.

U skladu s članom 9.2 Zakona o prijenosu, regulatoru i operatoru sistema električne energije u Bosni i Hercegovini, protiv ove Odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana prijema.

Broj: 05-28-12-88-17/23

20. aprila 2023. godine

Tuzla

Predsjedavajući Komisije

Suad Zeljković